

Icitetekelo

Icintu ca ntanshi ndefwaya ukwipusha iwe weulebelenga aka katabo nici, bushe uli mwina Kristu? Ubwina Kristu cipilibula ukuba nga-Kristu. Bushe ulacita ifintu mu bumi fintu Kristu acitile mu bumi bwakwe pe sonde? Aile alecita ifisuma, ukundapa bonse abale-cushiwa na ciwa.

Cinshi ufwaya nangu ukukabila mu bumi bobo? Cikankala sana ukuti amapange yobe yantu yalungama, nangu icintu ico ulecita tacilungeme te mulandu fintu cingamoneka ubusuma. Bushe ukukabila kobe kukwata ing'anda; limbi motoka ne ndalama ku banki; nangu bushe ukukabila kobe kukwata amakwebo, ukucindikwa, ukwishibikwa, nangu amaka ya mu calo? We munandi ici cimonwa ca bupina sana. Nga cakuti wali uwanonkesha, uwaishibikwa sana, kabili umuntu uwakwatisha sana amaka mu calo, kuti caba fye icafye kabili no kucusha umupashi. Imfumu Solomoni iya mu Baibele yalikwete ifi fintu fyonse, lelo atile fyonse fyafye.

Ukupoka uluse kuli Lesa e cuma fye icacine icishipwa. Ukusambilila ukufika na ku mpela ya bulungami pa fintu fyonse mu bumi tacili nangu cimo, pantu ifintu fyonse ifyaba muno calo fili no konaika pa kashita akanono, kabili takwakabe ukwibukisha pali fyonse.

Ilyo tulanda pakuityanya kwa ku ntanshi, bushe intanshi ilikwi? Bushe tayaba na Lesa? Aliikatilila umutima wa mfumu mu kuboko kwakwe, kabili alaupilibula konse kuntu alefwaya, nga kamana ka menshi, Baibele ilatweba. Alalenga icisuma, kabili alalenga ne cibi, kabili akwata inshila yakwe muli fyonse fibili, nga fintu caba mu malembo.

Takwaba intanshi muli cino calo nangu icikesa, ukwabula Lesa. Inshita imo nalilandile na kashimikila palwa ntanshi yakwe. Alepinga ukubombela Lesa lilya linefye apwisha ukulipila ing'anda yakwe; lelo, ilya ine fye nshita apwishishe ukulipila ishasheleko, umwana wakwe umu aliibile muli bamba ku numa ya ng'anda yakwe. Apela ifyakwe fyonse kuli Lesa pa kutendeka nga caliweme.

Inshita imo umuntu aliishile mu kulongana nefwe mu nshita ya bushiku, kabili lintu Umupashi wakwa Lesa waleleta abantu mu kulapila, alipelwe ishuko lya kupokelela ipusukilo, lelo alikene. Ubushiku bwakonkelepo mu nshita ya cungulo, mupepi na pa ng'anda ya malilo, nalolekeshe pa menso pakwe apafwa mu mbokoshi. Imfwa yalyumine bwangu bwangu pa numa ya kukana Lesa. Taali uwait-eyanya pa lwa ku ntanshi.

Mu kulongana kumbi, nalikonkomeshe abaume babili, kabili balikene. Panshita inono pa numa, kabili bonse baliifwa. Kuti casenda inshita ukulanda pa fintu ifya citika mu kushimikila kwandi ukushininkisha ukutila, takwaba intanshi ukwabula Lesa.

Takuli umutende ku mbifi Baibele ilatweba. Kwaliba icibulumo icabipa mu matwi ya ba cuma ico cishipwa. Ukuponenwa lyonse no mwenso wakulufya abatamwikwa, amalwele, ukupena, na macushi mu nshila ya bumi, kwikala kumo ukwa bupina. Ukulwisha kabili no kwesha, ukwisha ukusungilila ulupiya, nangu ukulufya ifipe fyesu fintu tubombela na maka sana, kabili no kucusha umuntu munensu ne misango yabipa, te bumi. Ubumi bwa bukapepa ubwa bu bumbi munda, ukuibepa fwebene lyonse, mu matontokanyo ya masambililo, ukuipela bucishinka fwebene ubwa citetekelo kabili ne subilo ilishimoneka mukati ka myeo yesu; bushe kuti mwalanda ukuti ubu bumi?

Amapange yesu aya milimo ya ku muntu munensu yalingile ukuba ayapwililika, kabili yalingile ukuba ayasuma, lyonse ukumfwa pa mulimo twapelwa ukuba nga kasunga wakwa munyina. Onse muli ifwe tulasungwa pa mulimo umu nangu umbi ukufuma ku muntu munensu. Lesa eflyo acibika muli uyu musango; e ico tuli bakasunga ba bamunyina.

Kaini alipeye Abelo, kabili alikene ukuba kasunga wakwa munyina pa mulandu wa kukabila kwakwe ukubi. Lesa akalambula umuntu mu mulinganya uyo.

Mwitontokanya fye pa mayanda ayasuma, ifyakufwala, kabili no kukwata imyotoka mumona ku bantu. Mwitontokanya pa mu-cinshi, ukwishibikwa kabili no bwikalo ubwa mu bumi epela; lelo tontontokanyeni pa fikulwa fya bapena, ifikulwa fya T.B., ifipatala, ilyashi ilibilwa lyonse mu mapapala kabili na malanda yonse aya mu bumi, ngo kulila kwa myotoka sha katenga malilo mu musumba ukalamba. Ifi fintu ifitinya, no kubikapo no mwenso kabili no kukalipwa, filanjeba ukutila teifi fyeka ifyaba mu bumi. Kwaliba incende ya pa mulu uko ukwaba umwela wa nsansa, umutende kabili no bulungami. Ukubombela Lesa kulaleta uyu mwela.

Ishiwi limo ilipapata ilyo ilyaita mu nkulo ne nkulo licili lileita imwe na ine. Lishiwi lyakwa Lesa, ukupitila mu kushimikila kabili mu bana bakwa Lesa, ukupapata ku bantu ukufuma fye lintu icalo catendeke.

Ishiwi lyakwa Lesa lyaleisansabika mu nkulo isha ku numa. Lyalepapata mu nshiku shakwa Noah, lintu ukonaulwa takulafika. Lyalepapata mu bushiku bwakwa Kristu lintu amacushi ya kalamba tayalaponena Yerusalem. Lyalelanda ku bantu lintu baleenda mu mabala ya ngano, ukuma bansamya, ukufwaya icifimbo ukufuma ku mabimbi ya bumi mu malendo ya kucimfya ili lyashi ilya mu myaka ya kale. Ukufuma ku kale kulefuma iciunda icatekanya ica mashiwi ukufuma ku mwina Galileo, uwaikela ubumi bwa bucushi pa mulandu wa imwe na ine. Ilelo lilya line ishiwi lilepepeta ukukonkomesha ku kalamba ku calo ca cikomo (socialism). Ndekwapusha ili lipusho we munandi: ninshi tushumfwila ubu bwite ukulapila, ukufututuka ukufuma ku bumi bwesu bwa fintu fya mu calo, kabili no kuibika ku bantu abo abaicefya?

Kristu atile ino nkulo ikaba iya bucintomfwa, iyatumikwa, amataki, kabili abaitemwa, kabili abatamwa ukwangala ukucila ukutemwa Lesa. Paulo atile aba bantu ebo impela ifikile. Abengi imwe, uku ndelandila, na mushika ba kampingu benu kale, kabili mwalileka no kumfwa, ilyo mwaipela mwe bene ku mupashi wakwa satana, ukubomba umulimo onse uubi.

E ico apo ifi fyonse fili no kusunguluka ifi, kabili ne milimo yabamo ikapya, Petro alipwishe, Bushe tulingile ukuba abantu ba musango shani, mu milandile yonse iya mushilo, imwe mufwile ukuba abenda mu mibele ya mushilo, abalolela no kufikilisha ukwisa kwa bushiku bwakwa Lesa?

Uyu wine Petro e wapelwe imfungulo sha mu bufumu, aimine, pa bushiku bwa Pentecost, ilyo ulukuta lwatendeke, kabili no kwisula umwinshi ku nkulo shonse. Balilingile amakana yatatu lilya line.

Pa bantu imintapendwa ine abaikala pano calo cesu ilelo, ni banga bali no kukutika ku mashiwi ya ntungulushi iyi ikalamba iyacefya, ilyo ishiwi lyakwa Kristu lileumfwika ukupitila pa milomo yakwe, ukulilila ku nkulo shonse?